

1. Pitanje:

Šta je potrebno kako bi se dobilo Uvjerenje o izmirenim obavezama po osnovu poreza i doprinosa?

Odgovor:

U svrhu dobivanja Uvjerenja o izmirenim poreznim obavezama, potrebno je podnijeti Zahtjev (u slobodnoj formi) u kojem je potrebno navesti svrhu u koju se Uvjerenje traži.

2. Pitanje

Gdje se podnosi zahtjev za Uvjerenje o izmirenim poreznim obavezama?

Odgovor:

Zahtjev se podnosi u Poreznoj ispostavi nadležnoj prema mjestu sjedišta pravnog lica ili prebivališta fizičkog lica.

3. Pitanje:

Koji je rok za izdavanje Uvjerenja o izmirenim poreznim obavezama?

Odgovor:

Rok za izdavanje Uvjerenja je 5 dana od dana podnošenja Zahtjeva.

4. Pitanje

Da li se plaća taksa prilikom predaje Zahtjeva za Uvjerenje o izmirenim poreznim obavezama?

Odgovor:

Podnošenje Zahtjeva za izdavanje Uvjerenja taksira se sa 5KM Federalne administrativne takse, a izdavanje Uvjerenja taksira se sa 10KM Federalne administrativne takse.

Markice Federalnih upravnih taksi mogu se kupiti u ispostavama Finansijsko-informatičke agencije.

5. Pitanje:

Da li je naknada za vrijeme porodiljskog odsustva koju obračunavaju i uplaćuju poslodavci za vrijeme porodiljskog odsustva i istu refundiraju od Centra za socijalni rad, oslobođena plaćanja poreza na dohodak u skladu sa članom 6 stav 1 tačka 1) Zakona o porezu na dohodak?

Odgovor:

U skladu sa članom 6. tačka 1. Zakona o porezu na dohodak ("Službene novine Federacije BiH", broj: 10/08, 9/10, 44/11, 7/13 i 65/13), iznos naknade plaće koje je predmet refundacije od strane Centra za socijalni rad je izuzet oporezivanja. Međutim, ukoliko poslodavac zaposlenici koje je na porodijskom odsustvu, na svoj teret

isplaćuje razliku do pune plaće, na taj dio je dužan da obračuna porez na dohodak i „pune“ doprinose.

6. Pitanje:

Koja fizička lica nerezidenti su dužna da se registruju i dobiju ID broj? Na koji način se pokreće postupak registracije i koju dokumentaciju je potrebno podnijeti u tu svrhu?

Odgovor:

U skladu sa Pravilnikom o dodjeljivanju identifikacionih brojeva, registraciji i identifikaciji i evidencijama poreznih obveznika na teritoriji Federacije Bosne i Hercegovine, nerezidentna fizička lica kojim se dodjeljuje identifikacioni broj poreznog obveznika su sljedeća lica:

1. lica koje ostvaruju prihode prema odredbama propisa koji uređuju porez na dohodak, porez na imovinu, naslijeđe i poklon, i porez na promet nepokretnosti na teritoriji Federacije - pokreću postupak registracije podnošenjem Obrasca POR-504 kod nadležne jedinice Porezne uprave gdje se nalazi boravište tog nerezidentnog fizičkog lica, te prilažu sljedeću dokumentaciju:

- a) relevantni dokument nadležne službe za strana lica (ovjerena kopija) u slučaju da lice ima boravište na teritoriji Bosne i Hercegovine,
- b) kopiju putne isprave u slučaju da lice ima boravište na teritoriji Bosne i Hercegovine,
- c) dokument (npr. ugovor) na osnovu kojeg se vrši isplata oporezivog prihoda u slučaju da lice nema boravište na teritoriji Bosne i Hercegovine,
- d) identifikacioni dokument podnosioca zahtjeva (na uvid) ili punomoć za podnošenje obrasca za punomoćnika (original ili ovjerena kopija)

2. lica koja u skladu sa propisima o azilu u Bosni i Hercegovini imaju izbjeglički status i/ili status supsidijarne zaštite – postupak registracije pokreće Ministarstvo za ljudska prava i izbjeglice Bosne i Hercegovine podnošenjem Obrasca POR-504 kod nadležne jedinice Porezne uprave gdje se nalazi boravište tog nerezidentnog fizičkog lica, te prilaže sljedeću dokumentaciju:

- a) kopija Kartona supsidijarne zaštite izdata od Ministarstva sigurnosti Bosne i Hercegovine,
- b) kopija Potvrde o prijavi boravišta, prijava i odjava prebivališta, odnosno promjena adrese u Bosni i Hercegovini izdata od Službe za poslove sa strancima.

3. lica koja u skladu sa propisom o strancima u Bosni i Hercegovini imaju odobren privremeni ili stalni boravak - postupak registracije pokreću podnošenjem Obrasca POR-504 kod nadležne jedinice Porezne uprave gdje se nalazi boravište tog nerezidentnog fizičkog lica, te prilažu sljedeću dokumentaciju:

- a) odobrenje za privremeni ili stalni boravak nadležne službe za strana lica (ovjerena kopija),
- b) identifikacioni dokument podnosioca zahtjeva (na uvid) ili punomoć za podnošenje obrasca za punomoćnika (original ili ovjerena kopija).

Nerezidentno fizičko lice koje se jednom registriralo i ima Uvjerjenje o registraciji

poreznih obveznika nema obavezu ponovne registracije u porezne svrhe, osim u slučaju izmjene podataka.

7. Pitanje:

Registrovan sam kao Trgovac pojedinac (radim na pijaci) i porez na dohodak plaćam paušalno, a od ranije imam poreznu karticu.

Da li je moguće da ja kao fizičko lice, koje ima poreznu karticu, podnesem Obrazac GPD-1051, te ostvarim povrat poreza na dohodak po Poreznoj kartici koju imam, a na osnovu paušalnih uplata koje sam uplaćivao?

Odgovor:

Porezni obveznici koji svoju poreznu obavezu izmiruju paušalno nemaju mogućnost korištenja ličnih odbitaka. Dakle, prilikom utvrđivanja njihove porezne obaveze - ne uzimaju se u obzir ni stvarni prihodi i rashodi u poslovanju, a ni lični odbici.

8. Pitanje:

Koje su obaveze poslodavca za lice angažovano po osnovu ugovora o stručnom osposobljavanju bez zasnivanja radnog odnosa?

Odgovor:

Prijava osiguranja u Jedinstveni sistem registracije, kontrole i naplate doprinosa za lice sa kojim poslodavac zaključuje ugovor o stručnom osposobljavanju bez zasnivanja radnog odnosa podnosi se na obrascu JS3120 nadležnoj ispostavi Porezne uprave u roku od sedam dana od dana nastanka osnova za osiguranje osiguranika.

Poslodavac je obveznik obračunavanja i uplate doprinosa za PIO za vrijeme obavljanja poslova bez zasnivanja radnog odnosa u mjesečnom iznosu od 30 KM u skladu sa Odlukom o visini doprinosa za penzijsko i invalidsko osiguranje ("Službene novine Federacije BiH", broj: 26/14). Za prijavu uplaćenih doprinosa propisanih Odlukom, poslodavac podnosi mjesečnu prijavu – Obrazac JS3320 i to istog, a najkasnije narednog dana od uplate doprinosa.

Ukoliko lice za vrijeme stručnog osposobljavanju bez zasnivanja radnog odnosa ostvaruje prihod po osnovu ugovorene naknade, isplatilac naknade je dužan obračunati, obustaviti i uplatiti akontaciju poreza na dohodak 10%, te Poreznoj upravi dostaviti elektronskim putem Obrasca APR- 1036 u roku od 5 dana od dana isplate naknade.

9. Pitanje:

Ostvarujem penziju iz inostranstva. Koje su moje porezne obaveze?

Odgovor:

Penzija koju ostvari rezident Federacije BiH u inostranstvu nije oporeziva i na istu se u Federaciji BiH ne plaća porez na dohodak.

10. Pitanje:

Prodao sam tri nekretnine. Obzirom da sam zbog nedostatka novca primoran prodati i četvrtu po redu nekretninu u roku od 3 godine, kakve su moje obaveze?

Odgovor:

Ukoliko u roku od pet godina otuđite više od tri nekretnine, dohodak ostvaren na ovaj način oporezuje se kao dohodak od samostalne djelatnosti, te je potrebno izvršiti registraciju djelatnosti. Nakon registracije kod nadležnih organa, bez obzira da li je u pitanju obrt ili d.o.o. potrebno je izvršiti poreznu registraciju. Postupak porezne registracije kao i potrebna dokumentacija propisana je Pravilnikom o dodjeljivanju identifikacionih brojeva, registraciji i identifikaciji i evidencijama poreznih obveznika na teritoriji Federacije Bosne i Hercegovine.

11. Pitanje:

Koje su porezne obaveze po osnovu prihoda koji ostvaruju fizička lica - iznajmljivači „stana na dan“ preko Booking-a, Airbnb-a i sl.?

Odgovor:

Porez na dohodak od imovine koji se ostvaruje iznajmljivanjem kuća, stanova, soba i kreveta putnicima i turistima koji plaćaju boravišnu taksu, obračunava se i plaća pri svakoj naplati najamnine po stopi od 10% na poreznu osnovicu koju čini naplaćeni iznos najamnine umanjen za priznate rashode (u visini 50% ostvarenog prihoda od iznajmljivanja) bez prava na lični odbitak.

Navedeni porez iznajmljivač je dužan prijaviti nadležnoj jedinici Porezne uprave gdje se nepokretna imovina nalazi putem Prijave poreza na prihod od imovine i imovinskih prava (Obrazac PIP-1034).